



BOLETIN DI INFORMASHON

Volúmen 01 • Ougùstùs 2021

Direktorado di Planifikashon i Desaroyo



DESAROYO DURADERO DI INFRASTRUKTURA

Pa medio di e publikashon aki Direktorado di Planifikashon i Desaroyo ta informá komunidad tokante di proyektonan pa loke ta trata infrastruktura.

E ophetivo di e boletin aki ta pa duna informashon tokante di proyektonan ku ta den fase di preparashon i tambe ku ta den fase di ehekushon.

E boletin aki ta e promé edishon ku ta ser publiká pa aña 2021. Direktorado ta spera di e forma aki pa por informá e pueblo debidamente tokante aktividatnan ku ta tumando lugá i ku lo bai tuma lugá den tempu binidero.

KONTENIDO

Programa di Mantenshon di
mas aña | página 2

Planifikashon pa aña 2021 |
página 3

Proyektonan pendiente
ehekushon | página 5

Plan di mantenshon struktural
di kaya | página 6

PROGRAMA DI MANTENSHON DI MAS AÑA DI KAYA

Pa medio di e akuerdo di gobernashon 2018 - 2022 (§4.1: "Aanpak achterstallig onderhoud van het wegennet") i tambe programa di gobernashon 2019 - 2023 (kapítulo 4: "Infrastruktura konfiabel, pagabel, sostenibel i seif" §4.2 Kamindanan i transporte públiko) a hasi palabrashonnan pa loke ta trata e aserkamentu di infrastruktura riba nos isla.

E palabrashon ta enserá ku Hulanda (ministerio di i & W) lo pone medionan finansiero disponibel pa asina por ehekutá trabounan di mantenshon di nos kayanan. Esaki a kondusí na e **Programa di Mantenshon di Mas Aña 2020 - 2023**.

Na yüni 2020 a kuminsá ku e trámitenan pa ehekutá e programa ariba menshoná, di kual a inisiá ku e proyekto Kaya C.A. Nicolaas.



TIM DI INFRASTRUKTURA



Direktor Sr. Marlon (Roy) Martina

Entrante 18 di mart 2021 Direktorado di Planifikashon i Desaroyo ta konta ku un tim dinámiko di profeshonalnan lokal.

E tim aki ta enkargá pa duna ehekushon na e Programa di Mantenshon di Mas Aña di kaya finansiá dor di Hulanda. E trabounan ta konsistí di preparashon, ehekushon i supervishon di e proyektonan ku ta kai dentro di e kuadro di e Programa di Mantenshon di Mas Aña di kaya.

Na e momentu aki aproksimadamente 90% di e proyektonan ku ta deskribí den e plan lo kontinuá òf kuminsá e luna aki.



There is immense power when a group of people with similar interests gets together to work toward the same goals

- Idowu Koyenikan -



PLANIFIKASHON PA AÑA 2021

E proyektonan ku ta kai dentro di e kuadro di e Programa di Mantenshon di Mas Aña di kaya ta lo siguiente:

📍 Kaya Commerce	Rincon
📍 Kaya Gramèl	Antriol
📍 Kaya Hermandad	Playa
📍 Kaya Berlin	Nikiboko
📍 Kaya Roma	Nikiboko
📍 Kaya Bruselas	Nikiboko
📍 Kaya Platina	Republiek
📍 Kaya Piedra Presioso	Republiek
📍 Kaya Neerlandia	Playa
📍 Kaya C.D. Crestiaan	Rincon
📍 Kaya Saturno	Belnem

RENOBASHON DI KAYA COMMERCE

E promé proyekto ku e tim a prepará, ku a ser finalisá resientemente, ta Kaya Commerce (situá na Rincon).

Renobashon di e kaya aki ta konsistí di entre otro, reparashon di e fundeshi kaminda esaki tabata nesessario, (re)konstrukshon di asera, kapa di asfalt nobo i tambe a dediká atenshon na e sistema di desagwe.

E meta primordial di e renobashon di Kaya Commerce komo un kaya prinsipal ta pa garantisá seguridat di usarionan di e kaya i alabes ordená e tráfiko na un manera seif, prinsipalmente ora ta trata di transporte di kombustibel.



RENOBASHON DI KAYA HERMANDAD

Kaya Hermandad ta unu di sumo importansia pa sirkulashon di tráfiko den e área di Playa. E kaya aki ta sòru pa e konekshon entre Kaya Betico Croes i Kaya Simon Bolivar. Ademas, e fluho di tráfiko den serkania di Stadion di Kralendijk ta keda manehá di tal forma ku peatonnan ku ta bishita e área aki por hasi esaki na un manera seif.

Trabounan di renobashon di e kaya aki ta andando i ta konsistí di: (re)konstrukshon di fundeshi i asera, kapa di asfalt nobo i tambe a dediká atenshon na e sistema di desagwe.



RENOBASHON DI KAYA GRAMÈL

Kaya Gramèl ta fasilitá bishitantenan ku ta hasi uso di servisionan di tantu Direktorado di Supervishon i Mantenshon komo Biblioteca Públiko.

Banda di esaki, en konekshon ku trabounan ku mester bai tuma lugá den futuro pa ku Kaya Korona (fase 3), Kaya Gramèl lo hunga un ròl importante den desviashon di tráfiko.


Pa por garantisá e seguridat di tráfiko i alabes e aksesibilidat na e servisionan ariba menshoná, lo hasi un renobashon kompletu di Kaya Gramèl. Trabounan ta konsistí di fundeshi nobo, kapa di asfalt nobo, asera, desagwe i posibilidat pa stashoná vehíkulo.

RENOBASHON DI KAYA NEERLANDIA

Kaya Neerlandia ta un ader mayó ku ta e konektá Antriol (Kaya Korona) ku Playa (Kaya Gob. Debrot). Debi ku Kaya Neerlandia ta un kaya prinsipal ku ta sòru pa e konekshon entre barionan, a tuma e desishon pa ehekuta e proyekto aki den 3 fase.

Fase 1 ta konsistí di trabounan di renobashon kuminsando for di e krusada ku Kaya Korona te na altura di e pòmpera di gasolin. Durante di e ehekushon di e proyekto aki lo keda informá pueblo tokante di e fasenan binidero.

Tumando nota di e kondishon aktual di Kaya Neerlandia, ta nesesario pa rekonstruí e kaya den su totalidat. Esaki ta konsistí di korekshon di suela, (re)konstrukshon di fundeshi, kapa asfalt nobo, asera i tambe sistema di desagwe.



PROYEKTONAN PENDIENTE EHEKUSHON

Proyektonan ku lo inisiá den luna di ougùstùs ta lo siguiente:

- Kaya Piedra Presioso;
- Kaya Platina;
- Kaya Berlin;
- Kaya Bruselas;
- Kaya Roma;
- Kaya C.D. Crestiaan.



PLAN DI MANTENSHON STRUKTURAL DI KAYA

Aparte di e proyektonan ku ta andando, tin atenshon pa situashonnan agudo ku mester keda atendé pa loke ta trata situashon aktual di nos kayanan. Banda di e Programa di Mantenshon di Mas Aña, Direktorado di Planifikashon i Desaroyo ta preparando un di dos programa ku ta **Mantenshon Struktural di Kaya** na Boneiru.

E programa di mantenshon struktural ta enserá repartishon di Boneiru den 5 área di trabou. Kompanianan en kuestion lo ta responsabel pa mantené i ehersé trabounan di mantenshon na e sekshon ku lo ser konferí na nan.

E meta di e programa di mantenshon ta pa atendé, na un manera mas pragmátiko, ku e retraso di mantenshon di nos kareteranan prinsipal.

Na fin di yüli a enkargá na 5 kompania pa kuminsá ku ehekushon di trabounan di mantenshon. Desafortunadamente a surgi un inkumbiniensia na e planta di asfalt kual a resultá den un retraso den e ehekushon di e programa aki.

Entrante fin di siman lo kuminsá ku ehekushon di e programa aki, ku lo tin su kontinuashon den simannan binidero.



KLOUSURA

Direktorado di Planifikashon i Desarojo ta konsiente ku tin hopi trabou pa realisá pa por yega na un infrastruktura duradero i seif pa nos komunidad. Pa por realisá esaki nos ta pidi kompreshon di komunidad den ehekushon di e trabounan nesesario i ke gradisí komunidad Boneriano di antemano pa e kompreshon durante di e trayekto di ehekushon di e vários proyektonan.



“ *Union ta fortalecé. ora ku tin kolaborashon i trabou den ekipo, kosnan ekstraordinario por keda realisá.*

— *Mattie Stepanek* —

”